

四庫全書

集部

欽定四庫全書

集部
剡源文集卷二十九

詳校官中書臣閔思毅

主事臣呂雲棟覆勘

覆校官中書臣方大川

校對官學正臣李巖

謄錄監生臣李如梓

欽定四庫全書

剡源文集卷二十九

元 戴表元 撰

律詩五言

三次韻寄戴祖禹

同分剡溪派自喜小王書
野服調驍馬濃香薰蠹魚
歲時趨闕里早晚上公車
與我真兄弟風流但不如

茗溪

六月茗溪路人看似若耶漁
罾掛棕樹酒舫出荷花碧

水千塍共青山一道斜人間無限事不厭是桑麻

道桐川欲訪梅右司不知其處

桐川瀟灑處面面碧芙蓉峻塔當關獨清溪抱郭重市
多吳客語祠有漢時封欲覓梅仙去知藏第幾峰

故總幹潘伯可從大挽詞二首

落落知難久堂堂竟不還江湖官七品風雨屋三間已
矣烏頭白嘻乎豹管斑兒曹莫輕脫英爽在空山

得死何須哭偷生正可疑倉皇歸印日慷慨却金時規

矩諸郎有襟懷我輩知平生郭有道消得蔡公碑

和鄧善之秋興二首

鬚髮日夜老神仙那可求揚雄識字苦玄晏著書愁碧
酒紅蓮夜朱絃白鴈秋論心得少暇同上最高樓

鶴化城猶在龍移井未枯百年吾道半六合此身孤西
土栽花屋東風賣酒壚佯狂覓耆舊處處土音殊

渡長泖投小蒸邵教授宿

清曉浮雙槳黃昏值一飧風鳴長泖浪雲揜小蒸村饒

極知鱸美驚還覺鴈喧同袍恩有愛燈火細溫存

客遊

客遊吳楚地最好是秋天三泖團臍蟹雙溪縮項鰱桂

林雲頂寺蘆蕩月中船酒醒

原缺

鴈猶勝聽杜鵑

自宣州至湖州風雪中十日始達

江湖老未休十日走三州南雪馬沒耳北風船打頭窮
猶携筆硯寒欲貫衣裘漸喜家鄉近兒童浙語稠

十二月二十三日華亭小泊華亭近方通潮

一一歌遊處今年又寂寥
雞聲生塢樹蜃氣雜江潮
斑白尋遺老丹青詫麗譙
衰懷緣子女不憚往來遙

次韻荅應德茂雪後遠寄

山中不來久何處度殘年
人悶如中酒村荒似禁烟
將茶冰箸煮移枕雪蓬眠
更肯狂歌否春風雙玉船

贈上饒道雲仲

江上青雲客天邊白馬生
百年文物似一席笑談傾
問舊能枚舉論財比芥輕
徘徊亦自好可便濯塵纓

送鄉同舍黃君賞謁陳提學

六館賦聲在五陵遊伴稀如何趨仕版猶自著儒衣春
晚鶯羞語城寒花慢飛江湖陳仲舉相見肯空歸

六月朔日再會再次韻與胡氏謙避暑

臺屋深難暑湖林近易風高歌送長日醉眼睨涼空雀
舌纖纖碧雞頭淡淡紅行藏數子別談笑一樽同

次韻蔚上人見寄

流落誰相憶山林蔚講師玄機魂夢接詩力鬢毛知舟

去須尋處書來不記時君看東海月今夜亦追隨

道衡書寄求詩

烈士蹈東海公仍歸白雲龍藏誰顧蛻鶴去不隨羣道
貌青難寫香風遠自聞人間塵垢子羞讀徑山文

次韻蔚講師新春之贈

每見輒自失春風雙鬢斑詩囊貧裡富藥市鬧中間
路通湖寺敞樓當郡山清緣事事足聽此屢開顏

史昭甫招陳宗魯之長興

之子滄浪去三吳西更西白鹽萸菜膾紅酒稻花雞地
少驚雲滿天空見日低錦囊看爛漫佳客醉留題

風雨行湖山村

風雨湖山暮屠村又鮑村鳥巡漁退艇犬認獵歸門天
作蠻雲暗溪憑剡漲喧十年燈火伴草次共魚殮

詠蠶

物亦有仁者蠶功不可量將身甘鼎鑊與世作衣裳過
棧蒼雲濕登山白雪香未知龍種似猶與馬羣妨

柏坑

西去疑無路誰知是剡津行多收柏客住有掘苓人寺
隱山前古村經水後貧時時百里外來此祭田神

證道寺

彎環青徑斜自是野僧家滿澗瀉巖液挿天排石牙爐
寒餘栢子架靜落籐花記得逃兵日門多貴客車

喜王丞病較

途窮已難忍那許病經時學到自無鬼命強客有醫飯

為扶壽本書是解煩資便作天台約山行未覺衰

丁亥歲除前二日書事

索索寒搜客沉沉雨洗年殘林生獵迹歸鳥避窰烟節
物杯漿外溪山鬢影前行藏都未定筆硯底能捐

寄雪竇同長老嘗許畫蘭不至

高高山頂寺更有最高人定起松鳴屋吟圓月上身雲
藏三伏熱水散百溪津曾乞蘭花供無書又過春

鄞城火後見光遠

火後丘墟市兵前風雨春那知攜手地俱是皺眉人海
柳吟猶弱山鶯聽未真明朝各分路何處避風塵

客言劉棊翁事

俗薄名難盛人窮迹易危從來天下士不計里中兒
隱玉看虹氣堅松任蠹枝相知不相識況又不相知

蔣堯仁監簿挽詩

家嚴宣和後官名德祐前不圖諸老盡竟得一身全
月旦懸虛鑒巾箱有祕篇堂堂何可得誰乞畫圖傳

照席鬚眉古傾筵咳唾清緋魚前進士刀筆老儒生政
熟元無譜書高別有評百年茲士少諸彦自編名

四十

四十不解事真成無用人交遊青草盡途路白雲新漸
覺名妨靜難將學濟貧堂堂楚龔傳猶有隱流嗔

夜坐

愁鬢丁年白寒燈丙夜青不眠驚戍鼓久客厭郵鈴洶
洶城噴海疎疎屋滿星十年窮父子相守慰飄零

晦亭

東海窮詩客西風古驛亭
髮從殘歲白山入故鄉青
世事徒三窟兒童且一經
丁寧速賒酒煮栗試沙瓶

孫常州挽詩

白髮何人在青山此老歸
殉携貧日硯歛著賜餘衣
文物鷗興滅園林鶴是非
諸公莫惆悵英爽世間稀

嚴提舉挽詩

判得身煨燼歌銘尚爾為
可憐蟬脫蛻還許豹留皮
剡

水歸來棹柯山看斷基平生觸心處臨卷費相思

靈雨溪漲抵郭可畏

黑雨連三日黃流迸一川盡漫騎馬路祇有釣魚船城郭功如此江湖興豈然兒曹却輕捷來往似飛鳶

夷齊

夷齊棄封國虞芮讓間田如何後世士尺寸事爭喧鄰居有愧恥況復兄弟間揜卷三歎息古風何時還

贈針醫范秀才

不但針經熟言談語語真鍊形如鐵佛信手合銅人秘
攝魚千里空飛鶴當輪功成倘相挾平地脫風塵

遊登袋寺寺出茶筍甚佳獨無杜鵑

苦雨忽相貸名山難久孤春泉新雀舌野苑嫩龍鬚土
宇錢王日風烟釋氏徒行人逢不問松吹自傳呼

其二

路絕猶人跡山空惟水聲如何芳樹裡不著杜鵑鳴筍
市層層出苗田寸寸耕縑流太清朴亭榭不標名

偶得巾樣問老匠云正古漉酒巾也

漉酒陶元亮名傳尚有巾方成執鞭志更著捧心人待
菊須簪髮臨流擬袂塵乃翁真處士吾黨祇間民

又作散愁

說窮人不信欲說更何為日永書腸覺霜濃病骨知
家兵潰後交絕廩空時頭白風塵境消磨尚有詩

太學冬至日同齋朋友先以兄弟叙拜訖遍詣
諸齋行禮出遂置酒湖上衣冠談笑之樂至今

栩栩在念間也因至日去近二十九和為正仲
道之

畫閣東爐早黃簾曉燭遲名函僮僕滿齒拜弟兄疑歌
酒神仙舫衣冠宰相碑如今窮海上逆旅話襟期

舊里火後多有築宅者太平客戶也

人說離鄉賤歸鄉更莫論許詢家莫幹杜甫客東屯廢
井微踪出新隣雜語喧平生江海意歲晚白榆村

食淡

世亂謀生拙村深食淡能沙蔬羹白煮山稻飯紅蒸暑
豉方傳友寒糟共學僧庖厨尚如此未嘆室生冰

寄謝王侍御

雲氣蓬萊閣霜威獬豸冠耽書真柱下執法更臺端步
驟三台近聲名七郡寒誰知階級禮許為腐儒寬

久客且歸留別郭于昭憲掾

久客令人厭初春乍許寒飛蓬妨覽鏡脫粟愧加餐坐
有誇年醕門誰住馬鞍重來會相見老性忍悲歡

趙壽父遊杭

東浙飢難住西湖遠不多好辭松葉麪來聽竹枝歌水
屋花千繞岩林錦一窠秋深道途好老子亦婆娑

隣友疫

歲惡災妖熾人窮性命輕如何赤髮鬼亦及白眉生忍
楚嘗親藥停哀寫子旌鄉隣拘俗忌哭弔並無聲

老態

老態誰能脫中年子自知丹胎三轉候卦氣一周時倦

動身如客單眠力勝醫看書亦漸懶意到或成詩

頓寒懷單祥卿教諭時新開酒禁

霜花一夜白風葉滿村黃欲出歲華老相思江水長留
枝遮鵲戶存蜜補蜂糧想見山行處開窓新酒香

蘇伯清席中領張仲賓所寄二詩兼聞陳無逸
已從湘南官滿歸養喜而有答仍次來韻

我愛張公子清言氣不低湖溝隨市轉亭樹與城齊杯
酒方花下扁舟又水西祇愁騎馬滑難惜錦障泥

次韻蘇教授立春書事

病老空山客寒紆積雪春麥苗青有主桃板粉成神短
策陶元亮輕舟賀季真征徭幸不及游眺雜閒民

讀閬風題林隱詩追和贈汪秀才

山林一跡地塵土二毛年避世書為屋謀生藥當田卉
衣從俗製疏供學僧煎渺渺滄溟去今誰魯仲連

送謝教諭

聞說龍泉縣儒風最可人墨池千澗縮石室四山隣北

學中連剡南音漸帶閩我冠作賓客罄折不須頻

蝗來

不曉蒼蒼者生渠意若何移蹤青穗盡眩眼黑花多害
慘陰機蛾殃踰蠱毒蛾秋霖幸痛快一捲向滄波

丁丑歲初歸鄞城

城郭三年別風霜兩鬢新窮多違意事拙作背時人雁
蹟沙場信龍腥瀚海塵獨歌心未已筆硯且相親

夜坐示友

夜久燭花落淒聲生遠林有懷嫌會淺無事又秋深黃
葉歸山夢白頭行路吟山中亦可樂不似此同襟

宿永固寺

小寺如山艇坐來風雨宵榻分機樹影饌帶菊花苗親
近談難褻孤馴聽不妖許由渾欠達嫌到野中瓢

孫太監挽詩

餘姚人

禹穴收雲氣滄江亦斷流真成掃地盡同作上天遊銘
誄看遺史衣冠入隱丘空餘平世眼曾望李膺舟

其二

穆祖收英俊斯人晚更成白頭真老監褐服舊諸生仕
國餘波遠儒鄉巨棟傾蒼蒼無處問西望累吞聲

風雨遊小大浦

海塢秋風裏無惊眼亦開潮衝烏嶼長雨過象山來畬
父收牛種漁丁拾廬胎乘桴吾豈敢人說近蓬萊

方處士挽詩二首

不謂高名下終金玉雪身交猶及前輩吾不似今人別

號行鳴雁遺編感獲麟
歛儀應自定只著古衣巾

其二

不比他人死何詩可挽君
淵明元嬾仕東野別攻文
滄海諸公淚青山處士墳
相看莫浪哭私謚有前聞

宿趙崧丞家

溪山兵後縣風雪旅中人
迫夜愁嚴鼓衝寒託軟巾
摧藏名自在疏率饌殺真
今代徐元直高風自可親

社日城南山作

社日年年雨江花處處春漸成垂白老不見踏青人榆
柳邊聲雜龍蛇歲事新端來近城郭猶自厭風塵

趙君理約同途不至

待子不來久烟山看樹青為吟天外句更立水邊亭雨
暖催科斗雲深長茯苓隣居亦有約休待鬢星星

送雙溪汪和仲往象山見周使君兄弟

五馬天邊外雙鳬海上翁白頭真避地黃卷舊趨風歲
月搜詩老山林把酒同漂零誰得去羨子逐飛鴻

聞應德茂先離崇溪有作

落日蘆花雨行人穀樹村青山時問路紅葉自知門
昔
荷窮詩味芭蕉醉墨痕端知棄城市經席許頻溫

交秋不雨

淤水飛成雨焦田灌作秋江潮雙趺底伏臘兩肩頭
鰕
蠨知何罪蛟龍自不憂吳兒有高廩正蕩采菱舟

曉行

漸漸路可識紛紛山轉多數難啼遠塢一鳥起滄波
藤

杖濕雲石筍鞋濃露莎何人尚高卧層構著烟蘿

同諸子行上畝山

白石秋更潔清溪寒自鳴牛羊爭道路鳥雀聚柴荆野
果高低熟山田早晚耕吾歸任衰懶兒輩託平生

晚投韓采岩

冬日寒難暝岩溪淺易冰猿飛紅果嶂人度白雲層望
屋多依竹逢樵半采藤艱難吾甚厭何處學孫登

下郝長塘小憩示陳養晦

野水通田白村山貼縣青
兵荒猶古道暑暍且長亭
稻地晴耕犢瓜田晝撲螢
吾詩不寂寞細諷與君聽

此地

又說風塵起人來似水流
飢窮餘此地嘯聚是何州
野白荒荒闊雲橫莽莽浮
相逢問田父未可賣耕牛

送徐生仁榮侍親遊山

蚤識梁松拜居成潘岳遊
一年歸雁雨四月落花秋
溪味涼供酒山聲晝入舟
歸來傳新語莫但作吳謳

簡王元剛併寄意王理得君玉

見說頻相憶新年已兩書雪肥秦望草春動鏡湖魚
繭紙堆成屋烏蓬走當車諸公有遊事少待意何如

紫溪鄔義翁挽詩

先君老友最是後凋人開館日千屢藏書山四隣
門迎新印綬壙掩古衣巾會哭皆英俊哀風暗海塵

題陳秀才溪山佳趣

城郭尋尋盡溪山宛宛來同誰遷蠟屐為子破蒼苔
書

欲爛斑設花須爛漫開趙郎題墨妙烟霧眼中開

東離湖州泊南潯

張帆出東郭沽酒問南潯畫屋蘆花淨紅橋柳樹深魚
艘寒滿巷橘市畫成林吾道真迂闊浮家尚越吟

次韻荅寄閬風舒先生

聞說鄉岩老風情不減前菊盤秋熟蟹竹枕晚涼蟬碑
碣僧頻謁詩囊客自編梅花紫溪路一別又三年

送陳養晦教諭之象山

聞說橫經處潭潭坐翠微
開窗見日出拂席有雲飛
藥市山山古魚餐水水肥
新篇應爛漫休遣遞筒稀

趙孟種脩職挽詩

辨得從容死知渠磊落人
風雲數世澤玉雪百年身
譜牒圖經舊園林墓道新
不知滄海上更費幾沾巾

送羅學正赴歙

文公湯沐邑子去作儒官
馬首千峰秀鶯聲二月寒
山禽攢俸納溪友借書看
近日科名闊青雲上不難

杜子問赴建康南軒祠長祠前花木可愛

一席清溪上深衣雪鬢翁揮犀談孔氏釋菜禮宣公堂
饌淮鮮白賓筵楚醴紅花臺無恙否回首幾春風

己亥歲歸過泉口紫芝山傷謹講師

行路夢猶在入門人已非山青古佛頂雲墨祖師衣
奕曾同拙看真似欠肥百年誰免此只合早忘機

三山鄭君挽詩

近日經師少人中又哭君遺編空白屋同列盡青雲塵

土千金產湖山數尺墳紛紛梁肉種誰得致斯文

送穹上人還里

但得扁舟便春風處處行定中三竺月禪外五

原缺

海

角雕胡飯山畦玉版羹清緣倘相就談笑解塵纓

褚叔豪赴山陰和靖祠長

此老真迂闊白頭方出山一燈河洛後千礎剡湖間講
鼓驚雲動書船載月閒可無容席地容我了躋攀

逢翁舜咨

相逢渾不覺，祇似宛陵貧。
裊裊花驕客，瀟瀟雨淨春。
借書消茗困，索句寫梅真。
此去青雲上，知君有幾人。

舟過嚴州

溪石茸茸出水泉，
滃滃懸銜盃仙洞。
頂挂席客星邊，
古岼魚為市窮鄉。
璽當田生涯著處有，
奔走愧華巔。

招王奕世

聞說銅山下，書屏四面開。
就僧煮紫筍，共客席青苔。
鐵畫年俱長，霜根頂未栽。
何當端午暇，一別剡鄉來。

再招奕世

雷晚還多雨山寒只似春
野榴開向客籬筍長過人一
寸書看懶三叉路走頻王
郎肯來否談笑共南隣

山中

野水晴猶漲春雷晚始鳴
地閒無堠邏山遠有蠶耕
身世通寒暑交遊半死生
方知一杯酒真勝百年名

七月初五夜養正堂示諸友

客裏猶多事秋來又一旬
青天星斗淨白露稻粱新
留

落空存節炎涼莫問人
儒堂得佳伴吟諷動比隣

袁提幹挽詩二首

短世誰無死深山獨有歸
送車晴起霧埋碣夜生輝
晦朔雞鳴在江山鶴夢非
剛言仁者壽近事例多違

其二

我昔携家走君曾埽榻招亂
離心易感生死義難消雅
魄歸泉壤潛光出市朝
平生五字苦寒泪洒山瓢

單漕貢君範挽詩

竟抱遺經死斯人亦可哀傳家一藝足涉世萬牛回白
屋身空脫青山手自開樵蘇且莫近玉樹炯泉臺

久客鹿頂承張景山寄詩次韻奉荅

但得無拘束身輕處處仙清談煨芋夜陳夢種花年水
竇羊腸折山籬鹿眼編詩來正清絕松下忽聞鷗

梅山

梅尉功成後安知不此來路逢耕者問山寺化人開樵
隴低通海茶村暖待雷談玄亦可隱不用顰蒿萊

律詩七言

乙亥歲毘陵道中清明

百年只有百清明狼狽今年又避兵
烟火誰家寒食禁簪裾那復麗人行
禾麻地廢生邊氣草木春寒起戰聲
渺渺飛鴉天斷處古來還是闔廬城

丙子除夜

富貴如今似駭機漂流未遣壯心違
鄉隣有酒貧能醉村落無醫病亦稀
客任低頭從狗竇妻休掩面對牛衣

十年涉世渾如此除却躬耕事事非

杭城風雨中簡子昂

五月錢塘風雨秋懷人頻倚面山樓雲收樹色遙成海
水學江聲暗入溝一斗盡輸無事飲千金不買辟寒裘
自憐寂寞無玄學車馬門前過似流

東湖第三溪上皆史氏故第

日晏霜濃十二月林疎石瘦第三溪雲沙有徑縈寒燒
松屋無人鳴晝鷄幾聚衣冠塊作土當年歌舞醉如泥

早知涉世真成夢不棄山田春雨犁

史亨父挽詩

玉食嬋娟非壽資清懷猶勝幾男兒壺觴竹寺尋秋月
燈火荷齋聽雨時補衲有衣曾禮佛吞舟無訣莫憑醫
平生瀟洒王文學地下相逢且說詩

吳允文叅議同登金陵鳳皇臺醉作

百年訪古此徘徊更上山椒掃草萊一段地腴奔馬瞰
數圍天險化龍開時聞營籍傳謠曲誰見禪宮離劫灰

李白不生王謝歇西風日落鳳皇臺

越城待旦

策策虛樓竹隔明悲來輾轉向誰傾天寒衡雁出萬里
月落越雞啼四更為底朱顏成老色看人青史上新名
清溪白石村村有五尺烏犍託此生

林村寒食

出門楊柳碧依依木筆花開客未歸市遠無餽供熟食
村深有紵試生衣寒沙犬逐遊鞍吠落日鴉銜祭肉飛

聞說舊時春賽罷家家鼓笛醉成圍

寄天台舒閬風先生

初丙子同避兵台之硤石

嶺雲盡處是台州有箇詩翁住下頭
不寄一書春又晚相思百里水空流
新蹤凍合鶯雛谷舊夢花迷燕子樓
聞說道旁烽燧急定應重作峽中遊

火後

當年歌酒留連處火後來看一惘然
傍水幾家初飲馬入春三月未聞鶉
炎涼世事殘城樹歌哭人聲去客船

不是危腸拚醉得顛狂無處著詩篇

過應浩然先生墓

人間萬卷龐眉老眼見堂堂入草萊行客須當下馬過
故交誰復裏雞來山花不語如聽講溪水無情自薦哀
猶勝黃金買碑碣百年名字已烟埃

劉正仲至寶山不值主人而去次韻奉寄

日日松間過

原缺

詩成忽在水雲西何人夜榻愁聽雨

無數春船倒上溪燕筍出時斑豹美鳳花開處杜鵑啼

東歸更踏來時路醉筆山牕取次題

遊陽明一洞天呈王理得諸君

禹穴蒼茫不可探人傳靈笈鎖烟嵐
初晴鶴點青邊嶂欲雨龍移黑處潭
北斗齋壇天寂寂東風仙洞草毵毵
堪憐尹叟非關吏猶向江南逐老聃

送旨上人西湖并寄鄧善之

聞說西湖也自憐君遊更傍早春天
六橋水煖初楊柳三竺山深未杜鵑
舊壁草生尋舊刻新岩茶熟試新泉

城中新友須相覓西蜀遺儒解草玄

辛卯除夜

臘月今年只今夕春風明日是明年狂歌把酒屠蘇地
醉眼看梅霧淞天碧玉千壺喧坐次紅牙六博鬪飛錢
頭顱雪白心情在聽說承平一惘然

拜袁越公墓因遊定水寺有懷源老

乃翁已作飛仙去猶得潭潭好墓田老樹背風深拓地
野雲依海細分天青峰曉接鳴鐘寺玉井秋澄試茗泉

我與源公舊相識遺言瀟洒有人傳

陪阮使君遊玉几

花滿車茵酒滿船亂雲堆裡訪枯禪林深何處無芳草
人靜有時聞杜鵑神屋畫飛青礧磧靈潭陰罩赤蛇涎
居然悟得松風夢回首廬山二十年

雪竇飛雪亭和孫使君

匡廬亦有千尋瀑無此陵虛翠玉臺身倚老松天上立
眼看飛鳥雪中來山神禁肅難投唾木落魂清得浣埃

見說下岩堪對望道人臨壑剪蒿萊

邑中滯雨示陳貴白

猶及相逢鬢未華故鄉春盡不須嗟園林處處生新草
風雨年年送落花高樹晝寒歸有鳥小溪湍急走如蛇
方知傲世不在隱高枕北窗聞打衙

十月朔旦寄貴白兄弟

黃牛村前秋葉飛青螺峰外海雲歸故人相思雪滿鬢
客子獨行風舉衣烏鵲定占誰屋喜鱸魚知比去年肥

當時歌酒江湖上百里音書今亦稀

次韻任起潛謀隱之作

江邊秋日逢任子大醉索詩吾欲狂為問山資何次第
祇餘丹訣轉淒涼黃金范蠡曾辭祿白首虞翻未信方
千古浮雲共歸意曉風城郭水花香

晚秋遊中溪四首

戊子

淡竹岡前沙雁飛小花尖下柘丸肥山雲不見雨自薄
天氣欲寒人正歸招伴祇須新稻酒臨風猶有舊苔磯

風流鬢髮莖莖在怪石老松今是非

其二

經秋溪水碧洄洄無數曉山如鏡臺紅葉流從龍輿出
白雲飛向石門來亦逢紙戶曾相識尚有樵蹤且莫回
端為何人作風物漫山漫谷野花開

其三

休折山中松桂枝溪魚亦小莫垂絲沙田翻白收秔後
霜樹著紅嘗柿時日落牛羊歸徑熟天寒烏鳥向人慈

出雲數里成官路問事如何總不知

其四

樹淡雲濃又一坡招邀處處是行窩
梯岩危似蟻緣木架屋高如鵲結窠
水味野栽茭白瘦山毛人摘芋紅多
行年四十不稱意更欲客遊知奈何

春夜喜陳汝晦見過

乃翁治獄多陰德之子論文有古風
尊俎祇容吾黨共衣冠能得幾家同
書林有業何妨隱徭籍無名莫怨窮

百歲相期今夕意，賴君咳唾起諸童。

鄉君子肯堂董君分教貴溪作詩奉寄

舟車赤日千餘里，筆硯清風二百年。
開口人知宗洛派，舉頭身欲近閩天。
絺袍涼擁松皮几，桂酒春浮藥玉船。
猶有英髦卧空谷，閒將名字訪華顛。

次韻荅陳叔高

蚤種青蒲已滿溝，暮栽黃菊亦成邱。
不辭西日射牛背，尚勝北風吹馬頭。
新雨客疎塵鎖几，故山秋淡樹藏樓。

艱難終竟鄉情耐，準擬行窩處處留。

次韻寄陳達觀少府兼簡叔高

懷人路絕雲歸海，避俗門深草蔽邱。
萬事漸消閒客夢，一生虛白少年頭。
山螢叫緩從除架，淮雁來多莫上樓。
近日隣家有新釀，每逢詩伴得淹留。

過清涼寺王叅預墓下

江左風流廊廟人，荒墳拋與梵宮隣。
多年羊虎猶眠石，敗壁貂蟬祇貯塵。
萬古雲山同白骨，一庭花木自青春。

永思陵下猶淒切廢屋酸風吹野薪

送僧無等遊華亭

華亭是我曾遊處記憶端然不作疎地帶三吳猶壯麗
人經二陸自詩書輕身羨爾能隨鶴薄味從來不為魚
未卜西遊時遠近道成相問定何如

送陳彥恂北上兼簡李奇卿學士

天末脩脩起畫舫驪歌清切也堪聽十年夜雨頭垂白
萬里春風草又青莫戀臯比專魯席終須易角瑞堯庭

平生短李江南傑今作文昌第幾星

於杭州九月送袁太初赴寧海教官

憐君跋涉走風沙九月江城飛雪花黃蝶終歸穿硯手
青藜曾_缺聚書家吟圓坐石題山葉講退登樓看海槎
年少交游渾好在何時相伴訪烟霞

次韻王監簿春前對雪之作

情懷未厭日如年幻境先看海變田梁苑貴遊圖畫裡
山陰風致酒尊前蝦鬚簾濕閒春曉猊舌香濃凝午烟

肯信高人有高卧磯頭新泊釣魚船

陳秀才問詩於余次韻贈之

叔壹

秋半說詩秋又闌覓從忘處更哦看不妨味熟心自悟
祇恐業成身轉寒竅木野風天倡和崩溪怪石鬼鏤刊
扳君更上最高頂莫羨千金遊子鞍

次韻荅胡山甫兼簡汪日賓

白髮詩翁南峽居肯來與子不相疎久知諸老難折簡
端為此家多貯書談吐清無涉俗處容顏衰似避兵初

溪梁一別還經歲接得新詩錦不如

其二

亂後交朋星散居如君那得易親疎耐多但有客滿座
忙絕不令兒廢書萬里山河蓬鬢底一春風雨杏花初
閒身共遜耽詩老野服枯藤得自如

寄袁季厚

莫笑衰顏老剡翁凶年過徹賸頑窮坐窗漸愛日南至
行路不愁天北風清話客多無酒款白頭交在有書通

聞知別野林泉美一策一簷吾欲東

挽舒君實

名襟號亦山

玉比清癯鶴比羸相看中路忽相遺詩才萬斛難供歎
樂論千箱不起哀定有意遊輕竹杖猶餘手剪碎松枝
南山山下徘徊處曾指佳城示阿宜

感事

死生契濶強兄弟南北分張好友朋戰國幾人成漢鬼
劫灰今日信胡僧翰林身後詩千首工部邱前米五升

山路陰寒魚雁絕舊遊何處寄槭藤

夢覺

夢覺依然一草寮浮蹤已慣任飄搖
虛簷晴氣生朝露遠樹寒聲過夜潮
白骨又驚山下滿朱顏剛向客中消
時平不愛通侯印且願深林作老樵

黎州山下有坡曰響地平黎州自孫興公經始
至今有祠其上

蒼茫一片莓苔地隨意觸來還有聲
定是戰坑餘箭戟

不然琴屋貯瓶罌名真過客多能記跡古居人不敢畊
孫叟有靈應索笑賦成留此試鏐錚

寄趙子昂濟南

濟南官府最風流聞是山東第一州戶版自多無訟獄
儒冠相應有賓游秋風魚酒黃梁市夜月笙歌畫舫舟
行樂使君詩筆俊一篇肯寄剡溪頭

陳無逸張仲實皆授徒城中相望遣悶小詩往

問

閒身不用苦咨嗟隨分風流閱歲華白日垂簾同賣卜
清流岸幘勝趨衙飛書漆槧詩無草夾註高檠眼未花
更喜芳隣連二妙時時衿佩問東家

蔚講師見示方便君唱酬詩次韻

長汀江上別多時白髮閒身天所遺避俗如仇翻好客
知窮為祟却耽詩鄉山雲淡龍移久湖市春寒鶴下遲
過盡榴梅與甜笋高侯還許放侯知

次韻如晦木犀因寄其從父性之老同舍

詩力如弓不易張
煩襟且覺對花涼
玲瓏南雪晴秋樹
浙窳西風夜月香
消得玉人歌古淡
許誰金屋鬪清狂
風流更憶同袍老
一塢閒雲傍水鄉

徐都目之官奉化

小壘飛書定不難
十年清苦舊儒冠
黃簾日轉山衙靜
彩筆春消海驛寒
坂馬易勞湏緩騁
潮魚雖美莫多餐
人來肯寄平安不
茅屋三間伴剡灘

次韻和蔚師鑑師春懷

愁是雲陰喜是晴春遊何處不關情黃雞亭館琴三弄
青果杯盤酒數行滿砌雨添新笋密隔牆風送落花輕
鑑湖湖上樵山老破帽枯藜過一生

次韻王景暘寄軒

江湖猶覺氣橫行羽褐藤冠學養生掣肘累輕天與福
欺心戒重鬼司盟行收耕稼閒勲業別有吟哦好性情
祇恐蹊成似桃李人來先識隱居名

剡源文集卷二十九

欽定四庫全書

剡源文集卷三十

元 戴表元 撰

律詩七言

送柯以善自杭遊鄂

江漢天風日夜清
君遊何處濯塵纓
雲從鸚鵡洲前出
月在鳳皇山上明
已羨經籬吳士艷
行看詞筆楚人驚
殘蓀賸並將何用
歸日分張與後生

讀福建廉訪輔大使弼字正匡遺事

臬官難稱是閩中遺愛堂堂得比公姓字丹青太史筆
歲時蓮豆素王宮一生薑桂那時辣百死江湖必向東
從古仁賢有家世名郎臺閣已生風

客京口

酒釀花穠鼓聒天百年成此好山川黃烟暮接淮南火
白米秋攢浙右船碑古猶多埋鶴寺田高耕遍臥牛阡
陳蹤興廢何由問只憶風流老米顛

金陵贈友

虎變龍肝此一時春風得似舊城池
宮閒軍賣偷來果寺廢僧尋斷去碑
水水魚肥供白鮓家家蚕熟衣紅絲
太平尚屬窮詩客酒賤如泥醉不知

湖山村

老去生涯學釣魚溪山忽憶似湘湖
風林四畔動竿瑟烟雨一篙行畫圖
小市篝明沽郭索平園柵樹脩於菟
偶然得住何妨住是處人間足畏途

己卯歲初葺剡居

休言轍迹轉沉淪百折江湖亂後身窮未賣書留教子
饑寧食粥省求人坐來齒避樵蘇長往處踪迷木石鄰
翻笑古來逃世者標名先製隱衣巾

耕桑

耕桑本是閒居事學得耕桑事轉多失曉麥叢憂出蝶
遲繅蚕繭怕生蛾調停寒暖春移芋偵候陰晴夏插禾
衣飯為誰忙不徹醉來乘興作勞歌

秋盡

秋盡空山無處尋
西風吹入鬢華深
十年世事同紈扇
一夜交情到楮衾
骨警如醫知冷熱
詩多當歷記晴陰
無聊最苦梧桐樹
攪動江湖萬里心

王丞自鄞城歸又許入剡

江城醉別太匆匆
風雪家園一笑同
儘健不妨天子老
絕清那許鬼欺窮
簡書異日關誰事
燈火寒鄉賴此翁
幾度丁寧雞黍約
掃關拂榻誤兒童

壬午清明

節序愁中都忘却見人插柳是清明登陴戍出吹彈樂
上塚船歸語笑聲解事濁醪相料理當權團扇正施行
悲歡寒暑君休問花鳥年年管送迎

寒食

寒食清明却過了故鄉風物祇依然窮中有客分青飯
亂後誰墳掛白錢落魄暖春為麥地陰沉溽雨近梅天
閒情正爾無歸宿石鼎新芽手自煎

無題

板屋驟喧飛白蟻紙窗欲雨暗蒼蠅長勞井臼慚妻子
近絕音書惜友朋夜半苦吟堪泣鬼日高甘寢祇輸僧
意衰俗物何難敗才薄天公却未憎

奉題孫使君池館

白髮使君經世材儘閒猶解暢池臺雜花屏障四時有
明月鏡奩三面開各坐山隨人意看正吟風遞鳥聲來
當年時雨堂前夢得似從容此一杯

常州有時雨堂

家西十里外茅洋小山中土塚纍然初不封樹

鄉先生舒文靖公墓也

莫輕數尺黃泥壤埋却斯人後更無山上自難生毒草
樹間長見聚慈烏樵耕可免憑鄉俗洒埽能來是學徒
後有宣尼湏痛惜待將墓額寫嗚呼

戊子歲晚贈應德茂

江海悠悠雪欲飛抱書空出又空歸沙頭人滿鷗應笑
船上酒香魚正肥塵土竟成誰計是山林又悔一年非
平生萬卷應夫子兩世知名窮布衣

寶山寺寒食次韻和閻翁

綠陰啼鳥春將老古寺垂楊日未西
客子欲歸風滿袖桃花無語水流溪
有人疏筍忘饑渴何處松楸雜笑啼
準擬一時僧榻畔詩翁題後更誰題

戊子清明前陪王丞度新嶺

一百五日熟食節七十一曲下山坡
寒暄相逢舊人少風雨欲盡新林多
青巖不辭掛春靄白鳥何處生滄波
途泥同興不同調我懶且休君更歌

同陳養晦兵後過邑

搜山馬退餘春草避世人歸起夏蚕破屋烟沙飛颯颯
遺民鬚鬢雪毵毵青山幾處楊梅塢白酒誰家擗柳潭
休學丁仙返遼左聊同庾老賦江南

送人遊霞嶼

霞嶼風烟接渺溟老仙萬鋪敞林扃峰前雁起湖雲淨
池面龍來海雨腥閱世僧閒頭黑白遊山客爽句丹青
何緣飛去清源國雨夜脩脩著翅翎

己丑正月六日袁季源家遭燬次韻書悶

鄴侯家裡書千架杜老尊前屋萬間此事吾堪慰流落
邇來天亦妬窮閒反風待禱真虛語嘆雨無方自厚顏
間挈殘家過西塢風流還許幾生還

正仲今年鄴城之約不就因次韻慰悅之

莫怪詩翁不出山詩多那得是山間清溪欲暖鶯啼樹
白日無人犬臥關不惜野花簪素髮時憑春酒轉朱顏
當年阮籍何曾達直到途窮始哭還

送于知州

居官難得是全名于守年多政轉清身為素王扶墜戶
手提赤子出饑坑使來公館文書簡吏退私齋几硯橫
似此雍容好風度天邊看著繡衣行

壬午六月八日書懷

懷人故國鱗鴻絕避地春園草樹長四壁空存醫俗具
千金難售賣醵方共兒生誦修吳語有客行歌銜楚裝
昨夜見花頻作夢南風吹海白茫茫

杖錫寺

仙草漫漫路不分
鐘魚那許外間聞
涼天九月已飛雪
晴日西山猶帶雲
火後客誇新屋樣
兵前僧惜舊碑文
藤湖只去招提頂
見說瀉田可種耘

四明山中逢晴

一岡一澗一縈隈
新歲新晴始此迴
莎坂南風寅蛤出
茅簷西日一禽來
人迷白路羊羣石
水捲青天雪裏雷
猶是深山有寒食
梨花無數繞巖開

魏文節公墓

萬騎南來駐不留衣冠客此鎮林丘寒巖碎裂從中起
亂水喧鳴竟獨流故物今惟存寓馬當年誰為指眠牛
墳傍小寺終村俗畫柱紗籠護冕旒

辛亥歲七夕醉陪諸公登西湖竹閣

畫鷁凌風汗漫遊雨聲飛出萬山頭江湖望閣邊城起
吳越音多客思柔野樹有枝猶繫馬官荷無葉不藏鷗
十年浪走紅塵道今日臨城始識秋

蔡舉食藕

地逢平處亦縈迴不是逃兵底肯來坡上一祠猶姓蔡
山前當路盡通台高巖童去收桐子鄰縣人過問藕栽
忽見深衣老儒者清時不信少遺材

辛巳歲六月三日書事

急報傳來又不真迎門翁稚笑聲頻情懷經苦思平世
顏貌緣愁似老人兵後尚多難料事山中誰是自由身
沙瓶酒釀鮭蔬有領取燈花一樹春

耕休

耕休何處散煩勞東隸西梁信所遭溪水清清照魚影
山風細細落松毛無名野草疑皆藥有韻村謠例近騷
稽古祇堪農圃用莫將車馬誤兒曹

畬齋次韻

貧賤知心老弟兄祇疑相得似前生避窮無地猶貪學
負謗如天底用名兵後脫身宜共惜書中薄業尚堪耕
殷勤預約頻頻見未見亦須頻寄聲

保福寺

漫天蘿蔓斷追尋
猶有人嫌未苦深
屋古淦當風雨氣
僧馴化得虎狼心
松花晝暖蜂科蜜
梅子春殘鳥戀陰
不應初來便忘去
身閒處處是山林

張景忠學正之平江

江南最好說蘇州
傍得閒官也自由
市舍酒香春四坐
湖田租熟雪千舟
歌成爛漫烏絲寫
意到縈紆盡鷗游
我亦少年心性在
經從準擬作遨頭

鮮于伯機家釣臺石

人間巖石亂紛紛
嚴子臺名最喜聞
何術縮渠千里脈
有人分得兩峰雲
天邊路遠星還動
江上潮回日又曛
解道泥途等軒冕
東西更有范希文

辛丑歲十一月二十六日東歸舟中示三子

節物悠悠不負公
江行三日雪花風
雲侵賀監山亭白
日在徐仙海島紅
自笑得雛如病鶴
也思結伴附歸鴻
何時辦得村田活
糲飯魚羹百指同

歸自西關有作簡余率公鈔使

白髮微官小祝同也隨年少踏春風鄉心幾夜馬生角
世味一時龜脫筒紅旆戍樓花整整綠莎溪路水茸茸
歸來健美余公子卷帙如山一覽空

貴溪董教諭回里

八月暄暄似小春鄞江歸客楚江濱夢中鱸膾紫莼菜
畫裏紵袍烏角巾不枉誇張別風土有時吟嘯雜仙真
年高官滿身輕健聊復婆娑亦可人

陳無逸教諭赴攸州

白露西風湘水清
蒼霞南岳晚天明
離家休說三千里
行道新看第一程
橘味熟來思母遺
草名疑處教兒評
人生誰是安居者
早拾貂蟬映父兄

周東鄉載酒冰溪上因遊岳祠醉作

葫蘆城下草平沙
狼牙峰前溪吐花
晴日路塵清野馬
空林人語亂神鴉
饒思火甕生燒笋
渴愛山爐熟煮茶
投老遠遊何所惜
為君歡坐岸烏紗

次韻東魯省游石龜山

一舸悠悠醉又醒
溪山無語意分明
龜身何日化蒼石
鶴背有人遊紫清
百榼頒空看少俊
千金難買是春晴
筵端宋玉尤騷絕
游戲長歌復短行

寄趙子昂

溪上輕雲去若飛
花間密石靜相依
遲行自愛款段馬
雜坐誰嗔短後衣
江海於人元不薄
風流如此欲安歸
集賢學士吾兄弟
近日音書亦較稀

亡友內翰趙公晦叔哀詩

振鷺庭中飮坐身行藏空寄輓蒲輪上來鬼泣荆山璞
獵罷人驚魯外麟死肯扣閤排貴倖貧猶傾橐施鄉親
平生一一明經術雋永依然世澤新

次韻荅貴白

斗粟千錢不易酬海風吹斷寄詩郵誰家盛設蟹黃餅
有客翻披狐白裘春樹自隨冬樹老官河長挾野河流
隔生兄弟何須說來作城南十日遊

清華堂

人生隨分有清華萬竹岡頭第一家
甃塹水溫初荇葉粉墻風細欲梨花
衣冠蒼皓迎如畫綉素朱黃積滿車
從此儒林添膾炙老夫先借小詩誇

陸君采都目入閩

趨閩漸近解閩吟公子來時夏欲深
捲地翠棚榕樹驛漫天紅錦荔枝林
官庖雋永多珍膾野語啁嘲有怪禽
風物自佳難逗遛浙江歸棹待相尋

亞尹黃侯慮囚溫處婺三州

金華瓊秀抵仙都雁宕石門天下無眼見朱幡出雲霧
手提丹筆洗焦枯海魚味爽休多食嶺馬程艱合緩驅
定有車前投贄者幅巾麻褐是真儒

簡湯及翁

六十三翁尚美髯今年添盡白髭髭心如晚路思家馬
身似春筐欲繭蚕無事官曹容岸幘有時書帙當清談
風情最苦湯公子家世衣冠舊汝南

舒子俊見過

來往通家不厭頻
青山心性白雲身
陰林石溜風傳語
霜月溪梁水寫真
歲險魚鮭難猝致
天寒烏鳥自相親
燎爐薪暖糟床響
隨分歡留作好春

以家事付諸兒惟不得姑蘇陸氏女子消息

祇憐地僻少過從
更許年衰養惰慵
行健有時尋近局
起遲常日到高舂
鹿皮冠野頻頻戴
駝頂䟽粗款款供
兒女團圞俱在眼
獨憐無信過吳松

江海

江海三秋古鄮城山林百拙剡溪生歸來鄉國方為客
絕盡交遊更畏名白帽管寧形態醜黃金季布語言輕
荒齋竟日無人事自作長歌寄好聲

兵後復還白巖山所舍作

脫命歸來意恍然餘生堪喜亦堪憐財逢亂世真如土
人到窮途始信天問訊比鄰晡爨後呻吟兒女夜燈前
明朝又作安西計飯後誰家沁雪田

鄞塘田家

經秋心事轉衰頽客舍山村病眼開
識路牛羊緣坂過通家燕雀下簷來
饑從野槥分蔬飯渴指鄰帘買黍醅
世事百年誰較是髯公鼻息盡如雷

江村遇九日

去年九月江城角尚得臨風把一盃
今歲併無黃菊看誰家更遣白衣來
身猶是雁飛難泊時不如潮去解回
還有南山會人意晚舟相對碧崔嵬

再寄曹居士

江海悠悠不為名年深識盡世間情於人有信惟潮候
去處無嗔是鵲聲新欲收書添累重舊曾學劍向財輕
如何此日投閒迹又結精廬傍古城

兵後見三江口木芙蓉盛開

江上秋花無數生紅紅白白照江明當年茂苑看曾厭
今日荒村望急驚泣雨羈臣愁去闕歌風艷女惜傾城
蕭條欲別那拚得移向東籬配菊英

遊西峯余兒時讀書其旁

山迴水抱西峯寺二十年前日日來一出居然負丘壑
深藏還此遠風埃農樵識面逢多問魚鳥知心見不猜
家世剡人須住剡相尋未識百千回

鮎埼唐鄉貢大置酒悟空寺見歎

南宮通籍唐先輩白髮天寒海上洲五鼎已推華屋夢
一尊猶及少年遊桃源有吏今安避銅雀何人死亦休
祇羨龍鍾老禪伯倚欄無語看沙鷗

調貴白

客裏光陰取次休，嫩寒一夜襲衣裘。
不須多畏趙盾日，正好深悲宋玉秋。
紅葉舊題猶在手，黃梁新夢又從頭。
餘糧栖畝猶圍坐，此事輸君第幾籌。

白巖山

漠漠溪風吹路塵，白巖山下幾窮身。
秋深竹色老於樹，晝靜鳥羣喧勝人。
何處人家藏剡錄，有時行客裹唐巾。
平生笑殺朱翁子，剛為乘車棄負薪。

絕句五言

雜體附

班婕妤題扇圖

時情任銷歇，閨思轉慙懃。也勝山陰媼，揮毫託右軍。

子昂秋林行客圖

石稜稜而白，出樹悄悄以紅披。嗟縞衣之嘉客，方策蹇以何之。

五雜俎

五雜俎金花綾往復來官路程不獲已始歸耕

五雜俎斑斕衣往復來反哺兒不獲已為人師

絕句七言

張騫乘槎圖

數尺枯槎底易騎海風吹浪白瀰瀰如今市上君平少
曾到天河也不知

呂氏六桂堂

年少奔馳有底忙棘闈蘭署夢茫茫白頭鞍馬風沙裡
聽說燕山六桂堂

周秀才惠猫

狸兒輕捷豹兒斑作勢擒生也不難
漸覺形神欲相賀
青奴黃妳夜平安

汪濟秀才飯牛稿

冰雪玲瓏汪太中吟詩十葉有家風
天寒日暮江東道
逢此顰伸牛口翁

蘇李圖

塞北中郎雪滿頭隴西壯士淚沾裘
人生百歲能多少

直至如今說未休

玄廟二道士俱以酒死

張髯好客月千壺
余吃清貧逐斗沽
二子若逢仙讌會
化成一對酒葫蘆

湖州

山從天目成羣出
水傍太湖分港流
行遍江南清麗地
人生只合住湖州

其二

一飽懸天不待求
幾人乾白少年頭
君看滾滾東流水
到海成淵始懶流

百鷺圖

題陳汝朝

葦折荷枯可奈何
西風吹影淨婆娑
微君作此超搖趣
一箇江天也厭多

因營張村蠻窩并書所見

老子來無一把茅
居然得此好窪坳
開塘謹避蛟龍窟
伐樹須存烏鵲巢

其二

頭白西來不買田
時時却費買山錢
一丘一壑吾歸矣
待得田多是幾年

其三

男兒三十氣吞牛
漏盡鐘鳴走未休
不問征西并處士
山中一樣土饅頭

百鴈圖

近看分明遠欲無
水天空闊好江湖
幸然不入虞人眼

又被閒中畫作圖

題番陽徐氏雙頭牡丹圖

天公幻化不經意
雙萼忽然枝葉同
一似人間好兄弟
朱鞍錦轡踏春風

陳公哲梅花百詠

梅下故人呼不應
石橋溪水泠泠回
頭聽得陳驚坐
一似春風吹夢醒

其二

雪後西湖空碧波酒徒消散也無多白頭醒眼春風裡
奈此梅花百詠何

張道士求檀林詩

地移淮橘多成枳人說江梅竟是枳蜀木似檀成底用
盛時名字落江南

酬陳秀才

一春一百二十日日日開眉得幾人直與破除風雨去
今年渾似不添春

賦董氏雙岐竹

山莊一對青青玉，瀟灑天然同幹生。
說與人間好兄弟，時來林下聽風聲。

讀書有感

魯女悲嗟起夜深，當年枉却淚沾襟。
如今已免鄰人笑，老大知無欲嫁心。

其二

最愛徐生欲避秦，海天東去不通津。
絕知勝似桃源境，

男女同行五百人

題子昂照夜白

風前新解錦鞍韉雪色模糊霧色寒此物人間無處著
千金祇得畫圖看

題蘇李泣別圖二首

弓疲矢盡三千里節弊衣穿十九年流落天涯有離別
當時誰擬畫圖傳

其二

沙雲如雪雪如塵握手相看語語真多少世間無淚面
一生錯笑隴西人

馬浩秀才攜秋日海棠詩見過

山城八月有春風一樹嫣紅淡又濃縱使失時無態度
也勝茉莉與芙蓉

奉化城西三溪口

青林白石三溪口斑笋黃梅四月頭正好清遊誰懶得
幸無公事且歸休

題趙子昂疊岫圖

百折雲顛路儘通無名怪木淡書空
相逢無問秋江客不是巴中是剡中

其二

白石青林底處無侵雲亦有小屠蘇
桔花飛盡不歸去揮汗江城看畫圖

九月西城無澗同陳道士衡上人

仙翁面帶江海色釋子口融冰雪漿
同是西風未歸客

燒香煮茗作重陽

其二

巾衣三客不須同
泉石相看我亦翁
最惜一軒秋爛漫
芙蓉池上木犀風

西興馬上

去時風雨客匆匆
歸路霜晴水樹紅
一抹淡山天上下
馬蹄新出浪花中

贈屋西小陳秀才

名公凱余字以無過

年少饑寒不足憂笑談有味自風流等閒輟贈兩兔頰
待看修成五鳳樓

其三

毛錐自是今無用鐵硯還知古可穿不惜日抄三萬字
勝儲百畝剡中田

蝴蝶

春山處處客思家淡日村烟酒旆斜蝴蝶不知人事別
繞牆閒弄紫藤花

夢中作

晴霞冠嶺朝紅潔
新漲連空晚綠酣
惆悵春風倦游夢
木蘭亭上望淮南

入杭

曾江白酒樊江飯
處處當年客似家
垂老重來舊相識
春風只有野桃花

題東玉師府所藏瀟湘圖

少年覓夢底曾閒
多在江湖烟水間
今日精藍方丈地

倚窓眠看洞庭山

灼艾戲呈阮使君

鬢毛秋後轉漂零
愁坐窮簷展灸經
得似畫堂歌吹裡
硫黃鍾乳按娉婷

水墨梅花

江海歸來見似人
離披猶自少風塵
何如淡月山莊夜
百幅清溪亂寫真

贈陸相師

江南江北路漫漫七十九翁能往還今代貴人容易識
卧龍不在草廬間

題伏生授書圖

白頭不死見時清子女相依解授經何用生男作鼃錯
乃翁一語不曾聽

題江干初雪圖

斷樹寒雲古岸隈漁翁初撥小船開看渠風雪忙如許
還有魚兒上釣來

銅山寺口初見梅花書寄何則顏二首

吳歌楚舞送年華
憶著終還不似家
今日春風吹夢醒
銅山寺口見梅花

其二

沙疎石瘦水涓涓
折得梅花費兩年
更與何人說瀟灑
香中行坐水中眠

戊戌清明杭邨坐雪

思鄉處處只愁生
正好春遊又不晴
雪是梨花雲是柳

馬婆巷口過清明

四明山中十絕

鴈飛不斷楚天長
雲路霜林級級黃
何處人烟有墟落
北風高壠散牛羊

右楓樹坑

山深不見焙茶人
霜日清妍樹樹春
最有風情是巖水
味甘如乳色如銀

右茶焙

小橫欲盡大橫來
萬壑千岩洶湧開
聞道洞天深幾許
紫雲深處有樓臺

右大小橫山

亂雲穿盡得平蕪一段冰寒碧玉壺猶是春風未相棄
山前吹長萬龍鬚

右北溪

洞深烟樹碧氤氲只采靈苗不采薪聞著蹤由多懶說
相逢莫有姓韓人

右韓采巖

怪石驚湍吼不休時時巖客飲寒牛誰知此水明州去
浸作琉璃萬頃秋

右莽廣溪

七里黃泥紅樹岡西風果熟一村香居人只道山深好
三百年來是戰場

右木蘭

仙在人間不易尋當時已道是山深可憐華表標題處
夜夜猿啼楓樹林

右仙山

兩頰稜稜額下分更無坳處可藏雲西風怕奪行人眼
蕎麥滿山鋪錦雲

右羊額嶺

劉郎一去杳無蹤水白山青只故宮欲問巖前老松樹
人間禁得幾秋風

右白水

題趙大年蘆鴈

寒更索索警霜叢兄弟當年意自同猶是江湖太平處

未妨沈著臥秋風

謝隣友陳仲學秀才惠玉芎苗二首

坊州杜若自堪羞
沛國青粘亦懶求
那似一叢蒼鳳尾
等閒收味古甌

其二

君家自有頭風藥
種在青青竹素園
此物但堪供暑啜
肯來相就發清言

瑞上人求詩

寶葉山中源悟師布衲百結面如癡十年相憶忽在眼
談笑甚似仍耽詩

其二

源公作詩可憐生亦有謾謾山林聲見說丰姿委練素
霜頰黛頂照人明

茅齋

紅杏園林雨過花遠陂深草亂鳴蛙春風不問茅齋小
自向階前長筍芽

感舊歌者

牡丹紅豆艷春天檀板朱絲錦色箋頭白江南一尊酒
無人知是李龜年

蕭照春江烟雨圖

波痕如樹樹如烟更是春陰小雨天何處得魚何處醉
筍皮蓬底解蓑眠

西塞山圖

空中生業寄魚蓑雲是親情水是家便有蹤由無處覓

春風岸岸野桃花

李元中秀才歲晚游諸公間

愁中待醉何曾醉
夢裡還家不是家
輸與山行窮學究
一筇一笠看梅花

丙午清明日青塘道中

三里五里沙路平
一番兩番溪雨聲
無奈春風動人處
紫荆青李滿林生

桃花寺石臺

臺前藤蘚碧交加
臺下清流直又斜
待得丹成知幾日
春風隨分野桃花

有人示山水畫卷
以為元暉作求詩

硯山山下小於菟
文彩爛斑今亦無
一塢亂雲濃似漆
春風吹夢過西湖

題孟浩然霜曉吟行圖

霜風颯颯攪吟鞍
童怖驢愁作許難
便使玉堂遭遇去
朝參更是五更寒

荀陳聚星圖

州里相過未厭頻居然蹤跡動星辰當時多少輝煌者
不畫諸公畫此人

梁楷畫雪塞游騎圖

聳脰攢蹄一駐鞍羶衣韋帽白漫漫祇應田舍騎牛者
無此風沙踏雪寒

過姑蘇

水天彌望接青蕪雲氣漫漫近又無一色好風三百里

挂帆安坐過姑蘇

五雲山圖

子昂為戚氏作

林廬深插紫屏顏一點漁舟帶暝還
但得身閒無俯仰人間處處五雲山

雨中過泉教張子開名先遇

平生剗夢十八九短策還經靜者居
一曲好溪山起處數聲疎雨雪來初

其二

衣冠顛倒君休怪筋力過從我有餘却笑秋風洛陽掾
得歸猶望食鱸魚

次韻荅隣友近況六首

十百琅玕接屋山麥花淡白菜花斑村園富貴誰消得
更看溪南墨牡丹

其二

炊成日影三竿直睡起溪流一尺高懵懂不知何歲月
山風吹白鏡中毛

其三

祝雞歸後放牛初
小立溪梁看打魚
漸喜村鄰盡相識
向來朋舊却無書

其四

剡源田舍誰能識
只此桃源有路通
草長岸漫漁塹北
月明人語紙槽東

其五

三間瓦屋數弓園
旋學桑麻又一年
村酒沾唇頻得酒

山歌出口即成篇

其六

舍南舍北種田郎
唱得田歌曲曲長
莫學傍村遊俠輩
茜紅抹額臂擎蒼

送陳養晦謁閬風舒先生四首

嚼雪餐冰二十年
空山日月自風烟
從君識盡搜詩法

不透鄉巖不是仙

鄉巖山名

其二

大篇無法須自悟小語有益最難尋
抵今人嫌此老謔
後來追憶直千金

其三

大冠襜袂走紛紛對面可容三斗塵
便令眼識天下士
此子已勝尋常人

其四

無詩莫入閨風里到却閨風那有詩
拾取松風作新曲
歸來時向夢中吹

同曹泰宇賦寶化鳳花二首

曹名說字習之

花開難得年年看住近須還日日來古壁危闌自顏色
不煩高築鳳皇臺


鳳皇不出幾何年莫怪山花惜杜鵑一樣春風好毛羽

回頭曾管蜀山川

鳳以杜鵑花為之

過鄖山祠塾作

滄江城闊三叉口白日弦歌數畝宮猶有祠官舊楊柳
向人離立管春風



劉源文集卷三十